

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা ৪৫/২০১৮-১৯

ঢাকা, বুধবার ৫ সেপ্টেম্বর ২০১৮, ২১ ভদ্র ১৪২৫

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে

- ১। এনইসি বৈঠকে একশ বছরের ব-দ্বীপ পরিকল্পনা অনুমোদন
- ২। ড্রিমলাইনার আকাশবীণার বাণিজ্যিক যাত্রা শুরু আজ : উদ্বোধন করবেন প্রধানমন্ত্রী
- ৩। সাফ চ্যাম্পিয়নশিপ ফুটবল টুর্নামেন্ট সম্প্রচারের মাধ্যমে বঙ্গবন্ধু স্যাটেলাইট-১ এর পরীক্ষামূলক কার্যক্রম সফল
- ৪। ক্ষমতায় যাওয়ার একমাত্র পথ জনগণের রায় নেওয়া : স্বাস্থ্যমন্ত্রী
- ৫। গাজীপুর সিটিকে সর্বাঙ্গিক সহযোগিতা করা হবে : এলজিআরডি মন্ত্রী
- ৬। আগামী অধিবেশনেই সড়ক পরিবহণ আইন পাস হতে পারে : সেতুমন্ত্রী
- ৭। মঞ্চনাটকের মান বৃদ্ধির জন্য প্রশিক্ষণ দরকার : সংস্কৃতিমন্ত্রী
- ৮। রাজধানীতে প্রধান সড়কগুলোতে লেগুনা চলবে না, হেলমেট ছাড়া তেল পাবে না মোটরসাইকেল : ডিএমপি কমিশনার
- ৯। সাংবাদিক মামুনুর রশীদ এর মৃত্যুতে প্রধানমন্ত্রীর শোক
- ১০। সাফ ফুটবল টুর্নামেন্টের দ্বিতীয় ম্যাচে ভুটানকে হারিয়ে বাংলাদেশের জয়

১। এনইসি বৈঠকে একশ বছরের ব-দ্বীপ পরিকল্পনা অনুমোদন

দেশের ইতিহাসের সবচেয়ে বিস্তৃত পরিকল্পনা ডেল্টা প্ল্যান বা ব-দ্বীপ পরিকল্পনা-২১০০ অনুমোদন দেওয়া হয়েছে। প্রায় শতবছরব্যাপী এ পরিকল্পনার মাধ্যমে বন্যা, নদী ভাঙন, নদী শাসন, নদী ব্যবস্থাপনা, নগর ও গ্রামে পানি সরবরাহ এবং বর্জ্য ব্যবস্থাপনা, নগর বন্যা নিয়ন্ত্রণ ও নিষ্কাশন ব্যবস্থাপনায় দীর্ঘমেয়াদি কৌশল নির্ধারণ করা হয়েছে। গতকাল (৪ সেপ্টেম্বর মঙ্গলবার) জাতীয় অর্থনৈতিক পরিষদের (এনইসি) বৈঠকে এ মহাপরিকল্পনা অনুমোদন দেওয়া হয়েছে। প্রধানমন্ত্রী ও এনইসি চেয়ারপারসন শেখ হাসিনা'র সভাপতিত্বে বৈঠকটি অনুষ্ঠিত হয়। সভাশেষে পরিকল্পনামন্ত্রী আ হ ম মুস্তফা কামাল সংবাদ সম্মেলনে বৈঠকের বিষয়ে বিস্তারিত তুলে ধরেন। সূত্র-ইত্তেফাক (পৃ.১,ক.৬), ইন্ডিপেনডেন্ট (শেষ পৃ.,ক.৭), নিউজ টুডে (পৃ.১,ক.১)। জনকণ্ঠ, ইনকিলাব, ডেইলি সান, অবজারভার এ বিষয়ে লিড নিউজ ছেপেছে।

২। ড্রিমলাইনার আকাশবীণার বাণিজ্যিক যাত্রা শুরু আজ : উদ্বোধন করবেন প্রধানমন্ত্রী

বহুল প্রতীক্ষিত আকাশবীণা আজ উদ্বোধনের পর প্রথমবারের মতো বাণিজ্যিক যাত্রা শুরু হবে। এ মাহেন্দ্রক্ষণে বিমান সেজেছে নবসাজে। বেলা দেড়টায় প্রধানমন্ত্রী শেখ হাসিনা উদ্বোধন করবেন ড্রিমলাইনার ৭৮৭। এ জন্য হযরত শাহজালাল আন্তর্জাতিক বিমানবন্দরে আড়ম্বর অনুষ্ঠানের আয়োজন করা হয়েছে। উদ্বোধনের পর রাতে ড্রিমলাইনারের প্রথম বাণিজ্যিক ফ্লাইট ঢাকা থেকে মালয়েশিয়ার উদ্দেশে ছেড়ে যাবে। এরই মধ্যে ঐ ফ্লাইটের সবগুলো আসন বিক্রি হয়ে গেছে। আকাশবীণা যুক্ত হওয়ার মধ্য দিয়ে বিমানবহরে উড়োজাহাজের সংখ্যা দাঁড়াল ১৫টিতে। গত ১৯ আগস্ট যুক্তরাষ্ট্র থেকে ঢাকায় আসে ড্রিমলাইনার। প্রধানমন্ত্রীর পছন্দে নামকরণ করা হয় আকাশবীণা। সূত্র-জনকণ্ঠ (শেষ পৃ.,ক.৭), যুগান্তর (পৃ.২,ক.১), অবজারভার (পৃ.১,ক.১), বাংলাদেশ টুডে (পৃ.১,ক.১)।

৩। সাফ চ্যাম্পিয়নশিপ ফুটবল টুর্নামেন্ট সম্প্রচারের মাধ্যমে

বঙ্গবন্ধু স্যাটেলাইট-১ এর পরীক্ষামূলক কার্যক্রম সফল

বঙ্গবন্ধু স্যাটেলাইট-১ এর মাধ্যমে বাংলাদেশ টেলিভিশন পরীক্ষামূলক বাণিজ্যিক সম্প্রচার শুরু করেছে। দক্ষিণ এশীয় ফুটবল ফেডারেশন (সাফ) চ্যাম্পিয়নশিপ ফুটবল টুর্নামেন্ট সম্প্রচারের মধ্য দিয়ে বাংলাদেশের নিজস্ব স্যাটেলাইটের কার্যক্রম শুরু হলো। বাংলাদেশ কমিউনিকেশন স্যাটেলাইট কোম্পানি লিমিটেডের চেয়ারম্যান ড. শাহজাহান মাহমুদ বলেন, গতকাল (৪ সেপ্টেম্বর মঙ্গলবার) সাউথ এশিয়ান ফুটবল ফেডারেশন (সাফ) চ্যাম্পিয়নশিপ সম্প্রচারের মাধ্যমে এ স্যাটেলাইটের কার্যক্রম শুরু হলো। বেসরকারি টেলিভিশনগুলো বঙ্গবন্ধু স্যাটেলাইটের সুবিধা পাবে অক্টোবরের মাঝামাঝি সময় থেকে। তখন বঙ্গবন্ধু স্যাটেলাইট পুরোদমে কাজ করবে। এ সম্প্রচারকে বাণিজ্যিক কার্যক্রমের সফল 'প্রাক-পরীক্ষা' হিসেবে তিনি উল্লেখ করেন। সূত্র-জনকণ্ঠ (পৃ.১,ক.৮), সমকাল (পৃ.৫,ক.১), ডেইলি সান (শেষ পৃ.,ক.৬)।

৪। ক্ষমতায় যাওয়ার একমাত্র পথ জনগণের রায় নেওয়া : স্বাস্থ্যমন্ত্রী

স্বাস্থ্য ও পরিবারকল্যাণ মন্ত্রী মোহাম্মদ নাসিম বলেছেন, ক্ষমতায় যাওয়ার একমাত্র পথ নির্বাচনে অংশগ্রহণ করে জনগণের রায় নেওয়া। গতকাল (৪ সেপ্টেম্বর মঙ্গলবার) মৌলভীবাজারের জুড়ী উপজেলায় ৫০ শয্যাবিশিষ্ট নবনির্মিত উপজেলা স্বাস্থ্য কমপ্লেক্স ভবন উদ্বোধনশেষে আয়োজিত এক জনসভায় প্রধান অতিথির বক্তব্যে তিনি এ কথা বলেন। সূত্র-ইত্তেফাক (পৃ.২,ক.৪), সমকাল (পৃ.১৯,ক.৮)।

৫। গাজীপুর সিটিকে সর্বাঙ্গিক সহযোগিতা করা হবে : এলজিআরডি মন্ত্রী

স্থানীয় সরকার, পল্লী উন্নয়ন ও সমবায়মন্ত্রী খন্দকার মোশাররফ হোসেন এমপি বলেছেন, গাজীপুর সিটি করপোরেশন একটি নতুন সিটি করপোরেশন। এ কারণে গাজীপুর সিটিকে সর্বাঙ্গিক সহযোগিতা করা হবে। গতকাল (৪ সেপ্টেম্বর মঙ্গলবার) গাজীপুর সিটি করপোরেশনের নবনির্বাচিত মেয়র মো. জাহাঙ্গীর আলমের দায়িত্ব

গ্রহণ ও অভিষেক উপলক্ষে আয়োজিত এক অনুষ্ঠানে প্রধান অতিথির বক্তব্যে তিনি এ কথা বলেন। সূত্র-ইত্তেফাক (পৃ.৫,ক.৪), সমকাল (পৃ.২,ক.৫)।

৬। আগামী অধিবেশনেই সড়ক পরিবহণ আইন পাস হতে পারে : সেতুমন্ত্রী

সড়ক পরিবহণ ও সেতুমন্ত্রী ওবায়দুল কাদের বলেছেন, আগামী ৯ সেপ্টেম্বর সংসদের ২২তম অধিবেশনই হবে ১০ম জাতীয় সংসদের শেষ অধিবেশন। এ অধিবেশনেই প্রস্তাবিত সড়ক পরিবহণ আইনটি পাস হতে পারে বলে আশা প্রকাশ করেন সেতুমন্ত্রী। তিনি বলেন, এ আইনটি নিয়ে সংসদে বিস্তারিত আলোচনা হবে। গতকাল (৪ সেপ্টেম্বর মঙ্গলবার) সচিবালয়ে সাম্প্রতিক সময়ে একের পর এক সড়ক দুর্ঘটনার পরিপ্রেক্ষিতে বিশেষজ্ঞ ও সংশ্লিষ্ট ব্যক্তিদের সঙ্গে মতবিনিময়কালে তিনি এ কথা বলেন। এতে সুশীল সমাজের প্রতিনিধি, পরিবহণ মালিক ও শ্রমিক এবং আইন-শৃঙ্খলাবাহিনীর কর্মকর্তারা উপস্থিত ছিলেন। সূত্র-ইত্তেফাক (শেষ পৃ,ক. ১), সমকাল (পৃ.২,ক.৮), ডেইলি স্টার (শেষ পৃ.,ক.৫), বাংলাদেশ টুডে (পৃ.১,ক.১)।

৭। মঞ্চনাটকের মান বৃদ্ধির জন্য প্রশিক্ষণ দরকার : সংস্কৃতিমন্ত্রী

সংস্কৃতিমন্ত্রী আসাদুজ্জামান নূর বলেছেন, মঞ্চ নাটকের মান বৃদ্ধি ও তা ধরে রাখার জন্য প্রশিক্ষণ দরকার। কেবল বিশ্ববিদ্যালয়ের প্রাতিষ্ঠানিক শিক্ষা নাটকের মান বজায় রাখার জন্য যথেষ্ট নয়। এক্ষেত্রে সরকারি উদ্যোগের পাশাপাশি বেসরকারি প্রতিষ্ঠানগুলোও পৃষ্ঠপোষকতা করতে পারে। তাছাড়া যাদের জীবন-জীবিকা মূলত নাটকের ওপর নির্ভরশীল এমন নাট্যকর্মীদের বাছাই করে সিএসআরের আওতায় বাৎসরিক সম্মানির ব্যবস্থা করতে পারে বিভিন্ন করপোরেট প্রতিষ্ঠান। গতকাল (৪ সেপ্টেম্বর মঙ্গলবার) রাজধানীর বাংলাদেশ শিল্পকলা একাডেমির জাতীয় নাট্যশালা মিলনায়তনে পাঁচদিনব্যাপী 'আইডিএলসি নাট্যউৎসব ২০১৮'-এর উদ্বোধন অনুষ্ঠানে তিনি এসব কথা বলেন। সূত্র-ভোরের কাগজ (শেষ পৃ.,ক.৬), ইত্তেফাক (পৃ.৩,ক.৫)।

৮। রাজধানীতে প্রধান সড়কগুলোতে লেগুনা চলবে না,

হেলমেট ছাড়া তেল পাবে না মোটরসাইকেল : ডিএমপি কমিশনার

ঢাকা মহানগর পুলিশ (ডিএমপি) কমিশনার আছাদুজ্জামান মিয়া বলেছেন, মহানগরীর প্রধান সড়কগুলোতে লেগুনা চলাচল করতে দেওয়া হবে না। সেইসঙ্গে মোট ১২১টি স্থান ছাড়া অন্য কোথাও বাসে যাত্রী উঠানামা করা যাবে না। এক সপ্তাহের মধ্যেই এ স্থানগুলো চিহ্নিত করে দেওয়া হবে। আর যেসব মোটরসাইকেল আরোহীদের হেলমেট থাকবে না, তাদের তেল দেওয়া হবে না। তিনি বলেন, মোটর সাইকেলে তিনজন উঠতে পারবেন না। গতকাল (৪ সেপ্টেম্বর মঙ্গলবার) রাজধানীর মিন্টো রোডে ডিএমপি মিডিয়া সেন্টারে মাসব্যাপী ট্রাফিক সপ্তাহের উদ্বোধন অনুষ্ঠানে তিনি এসব সিদ্ধান্তের কথা জানান। সূত্র-ইত্তেফাক (শেষ পৃ,ক. ৫), সমকাল (পৃ.৩,ক.১), ডেইলি সান (পৃ.১,ক.১), বাংলাদেশ টুডে (পৃ.১,ক. ৬)।

৯। সাংবাদিক মামুনের রশীদ এর ইস্তেকাল : প্রধানমন্ত্রীর শোক

গত ৩ সেপ্টেম্বর সোমবার হৃদরোগে আক্রান্ত হয়ে একুশে টিভির সিনিয়র সাংবাদিক মামুনের রশীদ জাতীয় হৃদরোগ ইনস্টিটিউট হাসপাতালে চিকিৎসাধীন অবস্থায় ইস্তেকাল করেন। তাঁর মৃত্যুতে প্রধানমন্ত্রী শেখ হাসিনা গভীর শোক ও দুঃখ প্রকাশ করেছেন। এক শোক বিবৃতিতে তিনি মরহুমের আত্মার মাগফিরাত কামনা ও শোকসন্তপ্ত পরিবারের প্রতি সমবেদনা জানিয়েছেন। সূত্র-সমকাল (পৃ.৪,ক.৮), নিউ নেশন (পৃ.৩,ক.৪)।

১০। সাফ ফুটবল টুর্নামেন্টের দ্বিতীয় ম্যাচে ভুটানকে হারিয়ে বাংলাদেশের জয়

গতকাল (৪ সেপ্টেম্বর মঙ্গলবার) বঙ্গবন্ধু জাতীয় স্টেডিয়ামে সাফ সুজুকি কাপের ১২তম আসরের উদ্বোধনী দিনের দ্বিতীয় ম্যাচে স্বাগতিক বাংলাদেশ ২-০ গোলে ভুটানকে হারিয়েছে। তপু বর্মণ ও মাহবুবুর রহমান সুফিলের গোলে নিজেদের আড়িনায় দক্ষিণ এশিয়ার ফুটবল শ্রেষ্ঠত্বের আসরে বাংলাদেশের গুরুটা দুর্দান্ত হয়েছে। সূত্র- জনকণ্ঠ (পৃ.১,ক.৬), ইন্ডিপেনডেন্ট (পৃ.১,ক.১), নিউজ টুডে (পৃ.১,ক.১)।

=8=

সম্পাদকীয়

- ক. সংবাদ : রাজধানীতে ডেঙ্গুজ্বরে মৃত্যু ও আক্রান্তের সংখ্যা আশংকাজনক পর্যায়ে পৌঁছায় উদ্বেগ প্রকাশ করে এ ব্যাপারে সবাইকে সচেতন হওয়ার আহ্বান।
- খ. যুগান্তর, ভোরের কাগজ, বণিক বার্তা, সমকাল : প্রচলিত শ্রম আইনের ৪১টি ধারা সংশোধন করে নতুন শ্রম আইনের খসড়া নীতিগতভাবে অনুমোদন দিয়েছে মন্ত্রিসভা উল্লেখ করে নতুন শ্রম আইন শ্রমিকদের স্বার্থরক্ষার্থে যথাযথভাবে বাস্তবায়িত হবে বলে প্রত্যাশা ব্যক্ত।
- গ. যায়যায়দিন : কৃত্রিম সংকট তৈরি করে চালের দাম বাড়িয়ে বাজার থেকে অতিরিক্ত প্রায় দুই হাজার কোটি টাকা হাতিয়ে নিয়েছে ব্যবসায়ীদের একটি বিশেষ চক্র এক প্রতিবেদনে এ তথ্য প্রকাশিত হওয়ায় উদ্বেগ প্রকাশ করে এ ব্যাপারে কঠোর পদক্ষেপ নেওয়ার সুপারিশ।
- ঘ. ইনকিলাব : রাজধানীতে ‘অ্যাপ’ ভিত্তিক পরিবহণ ব্যবস্থায় কিছু বেপরোয়া, অদক্ষ ও অপরাধপ্রবণ বাইকার ও গাড়িচালক ঢুকে পড়ায় বিভিন্ন দুর্ঘটনা ঘটছে উল্লেখ করে এ ব্যাপারে সংশ্লিষ্ট সকলকে বিশেষ সতর্কতা ও নিরাপত্তামূলক ব্যবস্থা নেওয়ার ওপর গুরুত্বারোপ।
- ঙ. ইত্তেফাক : রাজশাহীতে সাত দশমিক চার-এক একর জায়গার উপর সাড়ে সাত কোটি টাকা ব্যয়ে গড়ে তোলা নওদাপাড়া বাস টার্মিনালটি প্রয়োজনীয় সংস্কার করে ব্যবহার উপযোগী করার সুপারিশ।
- চ. ডেইলি সান : হানিফ ফ্লাইওভারের কাছে অবৈধভাবে বাস-ট্রাকের স্ট্যান্ড গড়ে ওঠায় তা যানজটের কারণ হচ্ছে উল্লেখ করে এ ব্যাপারে কঠোর ব্যবস্থা নেওয়ার সুপারিশ।

উপসম্পাদকীয়

মানবকর্ত পত্রিকায় প্রকাশিত কলামে উল্লেখ করা হয়েছে, সমৃদ্ধ জাতি গঠনে গুণগত ও মানসম্পন্ন শিক্ষার বিকল্প নেই।

নিবন্ধ ও ফিচার

ইনকিলাব পত্রিকায় প্রকাশিত ‘পরিবেশ সুরক্ষায় গাছ লাগানোর বিকল্প নেই’ শিরোনামের নিবন্ধে অভিমত প্রকাশ করা হয়েছে, বাংলাদেশসহ সব দেশের বনাঞ্চল দখলরোধ, দখলি স্থান উদ্ধার এবং বনাঞ্চলে প্রয়োজনীয় বৃক্ষ রোপণ ও বৃক্ষনিধন বন্ধ করার জন্য কঠোর পস্থা গ্রহণ করা আবশ্যিক।

#

ডালিয়া/শুকলা/মরজিনা/সাদ্দা/রশীদ/মাসুম/২০১৮/৯.০০ঘন্টা